

D' Sintfluät

Vor'ämä Jahr da isch Gott z' Bsuäch cho - bim Noah Junior

Seid: „Uf dr Ärdä isch's wieder unerträglich wordä numä Chlaagä gheert myys Ohr.“

„Drum' büüw' miär ä'n Archä und sammlä yy vu allnä Läbewäsä n' äs Paar

I' zwölf Monat schick ich soviel Räägä wo alles vernichtet mit Hütt und Haar.“

Elf Monat schpeeter chunt Gott wieder verbyy - bim Noah Junior

Doch wo'n är wytt und breit kei Archä g'seht schimpft är: „Glyy chunt's gu rägnä dü Tor!“

„Dü weisch liäbä Gott ich ha myy's Beschti gä doch Zyytä hend sich g'wandlet.

Wo'n ich ha wellä mit Büüwä afah numä Ärger ha' miär yyg'handelt.

Alli Nachbarä sind Amok g'luffä - d's Büüwg'rischt nähm' diä ganzi Sicht

d'Stadtplanigsamt hend's üffbottä wo droht het mit Bundesg'richt.

Äui d'Büüpolizyy het Ysprach erhobä - ä Umwältverträglichkeitsstudiä verlangt.

Dass d's Meer jemals sett'i myy Gartä cho schprängi jedä Mänschäverstand.

Bim Fellä vu dä eignä Bäum fir d'Archäkonstruktion - ei' riesä Diskussion

D'Umwältschutzverbänd sind z'springä cho mit ärä wahrä Ysprache-Invasion.

Erschrächt wo'n ich ha wellä Tier yysammlä sind Tiärschützer cho mit roher G'walt.

Vergäbä han'ich versuächt z' erklärt - äs giäng' ja grad um'ä Arterhalt.“

„Ei Kampf ha'n ich g'ha mit em Arbeitsamt sie verbiätet miär diä eignä Söhn a'z'stellä.

De numä hochqualifiziert's Fachpersonal derf ä sones Projekt üffstellä.

Da het äui nu d'r Fiskus Wind bercho - b'hauptet ich well' d's Land verlah.

Doch bevor ich nit d'Styyrä und Gebührä täg' zahlä derf' ich mit büüwä nit afah.

Wiä Dü g'sehsch liäbä Gott myys Mänschä-Meglichä ha'n ich wirklich gää

Doch myy Durchhaltewillä isch undergangä und so han'ich dyys Projekt üüfgää.“

Da het sich dr Himmel afah kläärä - alli Wolkä hend sich verzoogä

D'Sunnä isch firä cho zäuberet i d'Landschaft dr scheenschi Rägäboogä.

„G'seh'n ich richtig“ fragt jetz' Noah junior - lasch' Dü dyy' Wält-Zersteerigs-Plan la syy?“

Da seid Gott: „Äs isch ja nimmä neetig - drum kümmeret sich d'Bürokratie.“